

李文忠公全集

奏稿

三

李文忠公集

卷之三

李文忠公奏稿

卷之三目錄

進攻太倉援剿福山摺

同治二年正月十二日

達耳第福陣亡請卹摺

同治二年正月二十二日

覆奏降將江勝海等情形片

同治二年正月二十二日

請設外國語言文字學館摺

同治二年正月二十二日

籌援常昭摺

同治二年二月十七日

西兵克復紹興諸暨蕭山等城片

同治二年二月十七日

克復福山常昭解圍摺

同治二年二月二十五日

請假授支登總兵片

同治二年二月二十五日

克復太倉州摺

同治二年三月十六日

崑山獲勝摺

同治二年四月初五日

籌辦京米章程摺

同治二年四月初七日

米捐仿照銅捐給獎片

同治二年四月初七日
附章程

太倉獲勝摺

同治二年四月十二日

踏平昆山城外賊壘片

同治二年四月十二日

克復崑新摺

同治二年四月十六日

籌賑收復地方並酌請蠲免漕糧片

同治二年四月十六日

克復江陰縣屬之楊庫汛摺

同治二年四月二十八日

覆奏趙景賢死節摺

同治二年四月二十八日

分路規取蘇州摺

同治二年五月十一日

裁減蘇松太糧賦浮額摺

同治二年五月十一日

清查蘇松太糧積弊片

同治二年五月十一日

擊敗江陰無錫援賊摺

同治二年五月三十日

關稅留抵軍餉摺 同治二年五月三十日

李文忠公奏稿卷三

全集一之三

桐城吳汝綸編錄

進攻太倉援剿福山摺

同治二年正月十二日

奏爲官軍節次進攻太倉援剿福山各情形恭摺奏祈

聖鑒事竊常昭被圍降眾堅守調派各軍分路進剿緣由經臣於

同治元年十二月二十七日馳奏在案二十五六等日程學啟李鶴章等督率各營會合常勝軍正擬進攻太倉各門緣雨中止二十七日稍霽程學啟率領先鋒開字等營由西路進方至蟠龍鎮遇崑山援賊揮兵接戰排放洋鎗該逆抵敵不住旗隊靡亂副將宋有勝陳有昇劉士奇等各帶隊伍往來衝殺斬首數百級生擒百餘名奪獲旗幟刀矛無算逆匪敗回崑城我軍卽在蟠龍紮住李鶴章令記名總兵郭松林率領桂樹松建十二營五成隊伍及

常勝軍由南路進行抵南馬頭該逆憑河築壘以拒我師郭松林
與管帶常勝軍之奧倫以洋鎗劈山礮轟擊斃賊百餘參將李恆
嵩指揮西兵施放炸礮子落賊營打死黃馬褂賊目數人乘勝渡
河斬關直入該逆紛紛敗入城中我軍卽據其壘以護西兵大礮
正在部署間東北兩門之賊復出李鶴章飛調己革總兵況文榜
副將梁安邦各軍向前堵禦賊卽退回天復大雨因傳令各軍禁
定營盤以待詰朝會戰是夜三更賊由南門出撲松建各營我軍
憑壘堅守西兵亦開放炸礮轟斃多賊二十八日黎明程學啟率
隊扼堵西南援賊來路李鶴章令松建六營分進南門兩旁護放
西洋大礮自辰至午奧倫督軍將城牆轟塌數丈我軍渡過浮橋
攀城直上詎城內伏賊以千餘洋鎗死抵缺口子落如雨兵勇傷
亡過多又值浮橋驟斷後隊不能接應以致仍復退下賊卽跟蹤

追出郭松林從旁迎擊立斃悍賊數十名始行潰退是時程學啟
探聞崑賊復出恐蟠龍南面隊伍過單撤調西門外雲魁各營前
往協堵而以桂樹督標親兵四營代之該逆見我軍移動復從西
南兩門出戰喊聲震天李鵠章因飭降將周壽昌及副將銜吳建
瀛迎拒西門之賊郭松林迎拒南門之賊自率親兵小隊扼堵河
面添搭浮橋一道郭松林等奮不顧身往來血戰將奧倫所失炸
礮兩尊開花子十一箇奪回該逆敗退入城我軍仍回望仙橋駐
紮計常勝軍傷亡百餘人外國兵頭亦傷十餘人一時難期力振
該軍卽於二十九日退回松江是夜五鼓程學啟復率七營馳赴
西門挑戰城賊堅伏不動相持數時始行撤隊三十夜據探賊有
大股萬餘自崑山竄至蓬萊鎮竹司大橋之天福庵等處欲抄襲新
官軍後路同治二年正月初二日郭松林先派松建二營扼紮新

造橋自督四營進逼蓬萊鎮之右程學啟派開字左副二營及奇
字營由天福庵直抵竹司橋以攻蓬萊鎮之左自督開字正營及
卿雲兩營由中路直攻蓬萊鎮三路夾擊一鼓而前該逆猝不及
防見我軍勇氣百倍卽相率潰逃各軍併力猛追直至青陽港離
崑山不及十里計斬殺三百餘人生擒數十名落水淹斃者不計
其數此上年十二月二十七八等日進攻太倉及本年正月初二
日擊退蓬萊鎮踞賊之情形也其派赴福山之常勝軍五百七十一
人於十二月二十四日駛抵福山二十五日正擬進口無如灘闊
水淺各船去岸或數里或數十丈不等軍士皆解衣渡水而上賊
於江邊排列隊伍意圖邀擊守備張占春駕船開礮夾護我師賊
不敢逼自辰至午師乃畢濟以河東江邊大廟爲老營沙划等船
均泊廟後賊分三路來撲一由廟東襲我後路一由河西攻我軍

之右一由河東當廟而進外國兵頭勃蘭乃分派常勝軍以左路擊退廟東之賊以右路抵禦河西之賊並追殺過橋奪取賊卡輪船亦開礮轟擊我軍乘勢踏燬街後賊營一座其中路配帶礮車攻打河東之賊賊勢不支退入河西石營其營臨河對岸亦有賊卡中通浮橋相爲掎角我軍收回廟內鑿牆爲孔安礮以守之二十六日署提臣黃翼升統淮揚水師三營及總兵鞠耀乾副將黃登第各船齊集福山均派隊登岸會合常勝軍分路進剿焚燬賊卡二座圍攻河西賊營該逆憑牆開礮不肯出戰我軍數次攻撲陰雨泥滑未能得手海面颶風忽起黃翼升以該處沙灘無可停泊移駐福山上三十里之鹿苑港常勝軍亦以兵力過單於三十日撤回松江此十二月二十五六等日水陸各營奪燬福山賊卡之情形也查進圖太倉分剿福山無非爲節節打通救應常昭起

見乃太城賊援甚眾各軍未能驟進福山賊壘甚堅孤軍又難深入頃接周興隆駱國忠正月初二初五等曰自常熟城中密稟僞
稟聽潮各王黨眾數萬四面圍攻月餘不退忠逆李秀成復由蘇
州添賊萬餘礮船二百餘隻並帶大洋礮數十架食子數十斤於
正月初二三四晝夜轟打初五黎明業將大北門外營盤攻陷西
門外兩營亦相繼被踏孤城危險眾心驚惶臣無路能援徒深焦
慮復調駐防浦東之記名道潘鼎新副將劉銘傳參將張樹珊等
抽帶三千陸軍附搭輪船由海道繞赴福山會合黃翼升等師船
相機進擊一面專諭帛書慰諭城內降眾安心死守未卜能否有
救惟臣處兵力本單浦東西各城均須分防守無大枝勁兵可以
進剿前疊次陳明在案今不得已而協攻大倉又不得已而遠赴
福山前去後空已非穩著而事機所值勢難恝然惟有竭力籌援

以圖牽制而遏旁竄所有官軍節次援勦各情形謹繕摺由驛馳
陳伏乞

皇上聖鑒謹奏

達耳第福陣亡請卹摺 同治二年正月二十二日

奏爲中外官軍進攻紹興法國兵官權受江蘇副將達耳第福中
鎗陣亡請

旨優卹並派員接帶該軍恭摺奏祈

聖鑒事竊自勒伯勒東在紹興陣亡經臣等

奏明令法國兵官權受江蘇副將之達耳第福卽買忒勒赴甯接
帶勒伯勒東兵勇如果該員實力報效恪遵法度再懇

恩授以浙江武官職任核給劄付各在案茲據甯紹台道史致諤
稟稱上年十二月二十四日英國總兵吐蘂德克親運大礮赴營
籌攻紹郡該道兩商已革道員張景渠從中調度相機而行毋任
達耳第福急功輕進二十七至三十等日紹城逆首結連蕭山諸
暨之賊約一二萬人分路竄至東浦包家山白塔洋等處希圖包

抄我軍後路經張景渠抽調游擊布興有李光等分投截擊賊卽敗退並攻毀昌安鎮賊卡一座其竄近江邊之賊復經礮船轟斃百餘名我軍亦有傷亡先是咷藥德克會商進兵之策張景渠議分攻稽山五雲昌安三門達耳第福力主先攻西郭門阻之不聽張景渠恐有疏失添派知縣莊鳳威勁義勇先由西北接應知府王維圻法國兵頭常師帶常安軍紮昌安門外州同謝國恩帶信義軍紮五雲門外布興有廣勇紮陶堰李光靖逆軍紮蒿壩守備張其光廣勇紮東關知縣邊厚慶裏山勇及會稽民團駐嘯唶爲前勦後防之用本年正月初一曰我軍分道由東浦前進咷藥德克達耳第福帶領西兵車輪大礮逕攻西郭門常安信義各軍分攻昌安五雲兩門圍攻竟日轟塌西門城垛丈餘而城上復鎗礮環施子落如雨我軍未能得手卽於酉刻收隊初二日西郭門外

運開大礮城牆轟倒十餘丈斃賊無算達耳第福獨立橋上揮兵登城該逆以鎗石堵住缺口且有助逆黑洋人五六十名施放洋鎗打入達耳第福腦後傷重殞命同時陣亡外國兵頭一人西兵四名勇士二十餘名其餘受傷者不少張景渠咷藥德克傳令各營併力紮住惟逆援日增初三初四等日分股竄犯陶堰東關道墟蒿莊一帶蔓延數十里我軍以眾寡不敵傷亡頗多布興有退守娌浦李光退守梁湖張其光退至嘯唸與邊厚慶合隊駐紮遏賊東渡該道以兵力單薄添募勇士二千名協同堵勦初六七八九等日該逆屯踞烏門山包家山白塔洋分股肆擾均經兵勇民團分投擊敗共殺賊千餘名生擒二十餘名奪獲載米賊船三隻擊沈賊船三隻所有紹東逆卡一律踏毀沿塘將次肅清布興有等俱進紫東南兩路蕭山援逆裝運火藥鉛彈二十餘船接濟紹

逆又經噭藥德克半路要截擊斃及落水死者二百餘賊奪獲藥彈十七船城中之賊懾不敢出我軍聲威大振十一日法國提督伏恭由滬來甯商派該國參將德格北前往接帶達耳第福各勇仍屯西郭門外會商張景渠相機進攻該道已將達耳第福遺櫬迎護回甯安爲料理稟請

奏卹前來臣等查達耳第福打仗素稱勇敢上年八月在甯波帶領洋鎗隊擊退餘姚各鄉之賊克復上虞亦與有力旋回滬管帶法國教練勇權受江蘇副將職任十二月閒法提督商派赴甯接帶勒伯勒東舊部臣等飭聽甯紹台道節制到營之後恭順有加茲以急攻紹城身先士卒臨陣捐軀實屬異常忠勇可敬可憫相應請

旨從優賜卹以慰忠魂至接帶該軍之法國兵官德格北據史致